

Inatsisartut suleriaasiat § 37 immikkoortoq 1 naapertorlugu matumuuna Naalakkersuisunut apeqquut imaattoq saqqummiuppara:

**Nanortalimmi elevhjemmip inaarlugu sananeqarnissaa Naalakkersuisut qaqugu pisinnaasasoq naatsorsuutigaa?**

(Anders Olsen, Siumut)

**Tungavilersuut:**

Nanortalimmi meeqqat atuarfianni atuartut kollegiaat nutaaq 2012-ip ingerlanerani sananeqarluni aallartippoq, ukiullu massumap aallartisimalernerani iserterfigineqarluni atuartunit kiisalu ulluinnarni sullissisunit qujamasuutaaqisumik. Ullorli manna tikillugu sulii kantiinartaata suliarineqalersimanninnera assut paaserusunnarpoq sumik peqquteqarnersoq. Maannamummi atuartut kollegiami nutaami najugaqartut atuarfimmu ullormut arlaleriarlutik neriartortariaqartarput inigisaminniit ungasiartumut, tamannalu soorunami najugaqartunut naappertuutinngilaq piaarnerpaamillu pissutsit taakkua atuuttut aaqqiivigineqartariaqarlutik.

Sanaartukkap pineqartup tamakkiisumik aningaasalerneqarnikooreersup maanna killiffigaa aningaasanik akuersissutaasunik tamakkiisumik illikartitsivigineqarsimanninnera, taamaasillunilu Uummannami atuartunut angerlarsimaffissamut attuumassuteqanngittumut kinguarsarneqalerluni. Maannamummi Uummannami illumik pisinerup kingorna aningaasat atugassanngortinneqartut sinneqassappata aatsaat maani Nanortalimmi elevhjemmip saananeqarnera nangeqqinneqarsinnaasoq Kommune Kujalleq-mut nalunaarutigineqarmat. Taamalu sulineq akuerineqarsinnaangilaq suliat assigiinngitsut marluusut imminnullu attuumassuteqanngitsut patsisiliullugit suliamik unitsitsisoqarsimanera pissusissamisuunngitsoq oqaatigisariaqarmat.

Apeqquteqaatimma ullut suliffiusut qulit iluanni akineqareersimanissaat kissaatigaara.